

Na osnovu čl. 12. i čl. 19. Zakona o Agenciji za privatizaciju ("Službene novine Federacije BiH", broj 18/96), čl. 9. i 16. Statuta Agencije za privatizaciju u Federaciji BiH, te važećih odredaba propisa iz oblasti privatizacijskog postupka, Upravni odbor Agencije za privatizaciju u Federaciji BiH, na sjednici održanoj 28. aprila 1998. godine, donio je

## **TARIFNIK O NAKNADAMA**

### **I - OSNOVNE ODREDBE**

#### **Član 1.**

Ovim tarifnikom propisuju se iznosi novčanih naknada za poslove utvrđene Zakonom o Agenciji za privatizaciju u Federaciji BiH (u daljem tekstu: Agencija Federacije) koje obavlja u okviru svojih djelatnosti, te drugih propisa donešenih iz oblasti postupka privatizacije.

#### **Član 2.**

Poslovi koji su predmetom novčane naknade podrazumijevaju:

- poslove vezane za reviziju prethodne vlasničke transformacije;
- poslove troškova postupka prodaje;
- poslove vezane za obrazovanje, informisanje izdavaštvo;
- poslove kreiranja i izrade formularnih akata za građanstvo potrebnih u provođenju postupka privatizacije;
- druge poslove iz Zakonom propisane djelatnosti.

### **II - TROŠKOVI POSTUPKA REVIZIJE**

#### **Član 3.**

Troškove revizije prethodno izvršene vlasničke transformacije snosi preduzeće u kojem se revizija provodi i to: sat rada na poslovima revizije od strane ovlaštenog revizora iznosi 58,00 KM.

Iznos iz stava 1. ovog člana može se umanjiti posebnom odlukom Upravnog odbora, na osnovu prijedloga nadležnog organa. U troškove revizije iz stava 1. ovog člana nisu uključeni troškovi prevoza i noćenja.

### **III - TROŠKOVI POSTUPKA PRODAJE**

#### **Član 4.**

Organizator javne aukcije plaćat će naknadu za angažovanje ovlaštenih aukcionera i to:

- za angažman pomoćnika aukcionera iznos od 80,00 KM dnevno;
- za angažman aukcionera iznos od 120,00 KM dnevno;
- za principal aukcionera iznos od 150,00 KM dnevno.

U slučaju da se aukcijski centar nalazi 50 i više kilometara udaljen od mjesta prebivališta ovlaštenih aukcionera iz stava 1. ovog člana, organizator javne aukcije obavezan im je o svom trošku osigurati i smještaj (noćenje u jednokrevetnoj hotelskoj sobi sa doručkom).

#### **Član 5.**

Cijena obrasca punomoći - ovlaštenja, za davanje ovlaštenja učešća na javnoj aukciji, će biti izračunata na osnovu elemenata cijene propisanih zakonom, a koja će pokriti troškove štampanja obrasca uračunavajući i uobičajenu proviziju.

#### **Član 6.**

Cijena jednog standardnog-tipskog ugovora koji zaključuje prodavac i kupac u privatizacijskom postupku, bit će izračunata na način predviđen u članu 5. ovog tarifnika.

### **IV - TROŠKOVI DONOŠENJA AKATA U OPĆEM UPRAVNOM POSTUPKU I FORMULARNIH AKATA**

#### **Član 7.**

Na rješenja i druga akta koje Agencija Federacije donosi u privatizacijskom postupku, naplaćivat će se taksa saglasno Zakonu kojim se propisuje naplata taksi za akte u općem upravnom postupku.

#### **Član 8.**

Cijena kompleta formulara-obrazaca potrebnih u postupku kupovine stanova na kojima postoji stanarsko pravo iznosi 5,00 KM.

Komplet obrazaca iz stava 1. ovog člana čini:

- zahtjev;
- ugovor o kupoprodaji;
- izjava;
- saglasnost;
- osnovi i način obračuna cijene stana sa uputstvom za popunjavanje obrasca;
- prijedlog za uknjižbu vlasništva u ZK - KPU.

Svi obrasci u kompletu dati su u Zakonom predviđenom broju primjeraka.

### **V - TROŠKOVI ZA OBRAZOVANJE, INFORMISANJE I IZDAVAŠTVO**

#### **Član 9.**

Oblici organizovanja koje Agencija Federacije u okviru svoje djelatnosti vrši su: seminari, razgovori pod nazivom "okrugli sto" i drugi oblici.

U okviru programa obrazovanja učesnici će snositi samo stvarne troškove bez troškova za kotizaciju.

Ukoliko učesnici u privatizacijskom postupku iskažu potrebu za organizovanjem posebnih seminara koji ne potpadaju u kategoriju općih, dužni su plaćati kotizaciju u iznosu kojim će se pokriti troškovi za ostvarivanje navedenog posla.

#### **Član 10.**

Učesnici edukativnih seminara i drugih oblika obrazovanja snosit će troškove izdavaštva koji budu učinjeni na ime štampanja pisanog materijala neophodnog za ostvarivanje ovog posla.

#### **Član 11.**

Za časopis "Privatizacija", koji štampa Agencija Federacije utvrđuje se cijena od 7,00 KM.

#### **Član 12.**

Ovlašteni predavači za održavanje predavanja na seminarima mogu isključivo uz odobrenje i u saradnji sa Agencijom Federacije sklapati ugovor za održavanje seminara. Ugovor o održavanju seminara sklapat će Agencija Federacije, a naknada predavaču pripada u visini utvrđenoj odlukom Upravnog odbora Agencije Federacije od 03. 12. 1997. godine.

### **VI - TROŠKOVI ARBITRAŽE**

#### **Član 13.**

Agencija Federacije za arbitriranje između kantonalnih agencija i učesnika privatizacijskog postupka, ima pravo na efektivne troškove arbitriranja u zavisnosti od složenosti slučaja.

Troškove arbitražnog postupka snosit će predlagač arbitriranja.

#### **Član 14.**

U troškove arbitražnog postupka spadaju:

- putni troškovi;
- administrativni troškovi;
- troškovi angažovanja eksperata iz određenih oblasti;
- drugi troškovi koji budu uzrokovani provođenjem postupka arbitraže, a bez kojih se ne može postupak okončati.

### **VII - PRELAZNE ODREDBE**

#### **Član 15.**

Odluka Upravnog odbora od 03.12.1997. godine, o iznosima novčane naknade za održavanje predavanja i objavljivanja članaka predstavlja sastavni dio ovog tarifnika.

#### **Član 16.**

Izmjene ovog tarifnika donose se na način predviđen za njegovo usvajanje.

### **VIII - ZAVRŠNE ODREDBE**

#### **Član 17.**

Ovaj tarifnik stupa na snagu danom objavljivanja u "Službenim novinama Federacije BiH".